

**Kata Kunci:**  
**Ilmu**  
**Etika/Akhlak**  
**Keikhlasan**  
**Rendah Diri**



**Majlis Ugama Islam Singapura**

**Khutbah Jumaat**

**17 April 2026 / 28 Syawal 1447H**

**Pengajaran Daripada Tradisi Ilmu Islam**

أَحْمَدُ لِلَّهِ الَّذِي هَدَانَا لِهَذَا وَمَا كُنَّا لِنَهْتَدِيَ لَوْلَا أَنْ هَدَانَا اللَّهُ. أَشْهَدُ أَنْ  
لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ.  
اللَّهُمَّ صَلِّ عَلَى سَيِّدِنَا مُحَمَّدٍ، وَعَلَى آلِهِ وَأَصْحَابِهِ أَجْمَعِينَ. أَمَّا بَعْدُ، فَيَا  
عِبَادَ اللَّهِ، اتَّقُوا اللَّهَ. أَوْصِي نَفْسِي وَإِيَّاكُمْ بِتَقْوَى اللَّهِ عَزَّ وَجَلَّ، فَقَدْ فَازَ  
الْمُتَّقُونَ.

**Zumratal mukminin rahimakumullah,**

Marilah kita meningkatkan ketakwaan kepada Allah s.w.t., melaksanakan segala perintah-Nya dan menjauhi segala larangan-Nya. Semoga ketakwaan yang kita bawa pada hari ini dikurniakan keredaan-Nya apabila kita berdiri di hadapan-Nya di akhirat kelak. Amin, ya Rabbal 'Alamin.

**Sidang jemaah yang dirahmati Allah,**

Kita sedang hidup dalam satu zaman di mana perubahan, yang didorong oleh kemajuan sains dan teknologi, berlaku dengan begitu pantas, sehingga mengubah gaya hidup dan

penghayatan agama kita dengan cara yang tidak pernah terbayang. Saudara-saudara sekalian, perubahan ini akan terus berlaku. Seiring dengan kemajuan ini, timbul cabaran-cabaran agama yang semakin kompleks; cabaran yang menuntut penguasaan **ilmu** yang mendalam.

Dalam mencari panduan untuk menghadapi kerumitan masa kini, kita perlu meneliti tradisi keilmuan Islam. Tradisi ini telah melahirkan tokoh-tokoh hebat seperti Al-Khawarizmi, Ibn Sina, dan Al-Biruni, serta ramai lagi yang telah menyumbang dalam bidang matematik, perubatan dan astronomi yang masih dimanfaatkan hingga ke hari ini. Kesan yang berkekalan ini mengajak kita untuk muhasabah bagaimana kecemerlangan tersebut dapat dicapai.

### **Saudara-saudara yang dirahmati Allah,**

Terdapat banyak pengajaran yang boleh kita ambil daripada tradisi **keilmuan** Islam dan para ilmuwan yang dilahirkannya. Dari pengajaran ini, kita akan memberi tumpuan kepada tiga perkara yang amat penting.

### **Pertama: Menuntut ilmu memperkasa insan**

**Ilmu** membekalkan kita dengan kefahaman dan hikmah untuk mengharungi kehidupan serta cabarannya. Malah, hari ini, penemuan dan naratif baharu sentiasa mencabar persepsi dan pendirian kita terhadap beberapa isu agama. Oleh itu, menuntut

**ilmu** yang sah telah menjadi fardhu 'ain; kewajiban individu bagi setiap daripada kita.

Seruan ini amat penting khususnya bagi golongan muda yang mempunyai tenaga dan semangat untuk menimba **ilmu**. Pada masa yang sama, bagi mereka yang mungkin tidak lagi memiliki tenaga seperti dahulu, kita diingatkan bahawa walaupun tenaga mungkin berkurangan, masa untuk menimba **ilmu** masih tersedia selagi hayat dikandung badan.

Allah s.w.t. berfirman dalam Surah al-Mujadilah, ayat 11 yang bermaksud: *"...Allah akan meninggikan darjat orang-orang yang beriman di antara kamu, dan orang-orang yang diberi **ilmu** pengetahuan dengan beberapa darjat. Dan Allah Maha Mengetahui apa yang kamu lakukan."* Selagi masih ada peluang, marilah kita berusaha menuntut **ilmu** agar kita dapat memahami dan mengamalkan agama Allah dengan lebih baik serta meningkatkan darjat kita di sisi-Nya.

### **Kedua: Ilmu mesti disertai dengan etika, keikhlasan dan kerendahan diri**

Dalam Islam, **ilmu** dan **akhlak** tidak dapat dipisahkan. Tidak cukup sekadar mengetahui banyak perkara. **Ilmu** yang sebenar ialah **ilmu** yang membentuk **etika** kita, memperbaiki tingkah laku kita dan membimbing cara kita berinteraksi dengan orang lain.

Selebihnya, **ilmu** mesti disertai dengan **keikhlasan**; melakukan apa yang benar bukan untuk dipuji manusia, tetapi semata-mata

kerana Allah. Apabila **ilmu** dan **keikhlasan** berjalan seiring, ketika itulah kita benar-benar mula berkembang.

Tanpa nilai-nilai ini, **ilmu** akan kehilangan tujuannya dan bahkan boleh menjadi mudarat. Apabila **ilmu** terpisah daripada **keikhlasan** dan **kerendahan diri**, ia boleh membawa kepada sifat sombong, mementingkan diri, dan penyalahgunaan **ilmu** untuk meraih kepentingan atau agenda peribadi.

Kita perlu sedar yang walaupun **ilmu** boleh membawa manfaat duniawi termasuk ganjaran kewangan, semua itu hanyalah manfaat sampingan. Jika ia dijadikan tujuan utama, ketahuilah ia mencerminkan niat yang terpesong dan boleh menjejaskan pertimbangan **etika**. Apa yang sepatutnya menjadi sumber **ilmu** dan panduan boleh bertukar menjadi sumber kekeliruan dan perpecahan. Sebab itulah Islam mengaitkan **ilmu** dengan *khasyah*; rasa takut dan kagum kepada Allah.

Allah s.w.t. berfirman dalam Surah Fatir, ayat 28:

وَمِنَ النَّاسِ وَالْذَّوَابِّ وَالْأَنْعَامِ مُخْتَلِفٌ أَلْوَانُهُ وَكَذَلِكَ إِنَّمَا يَخْشَى اللَّهَ  
مِنْ عِبَادِهِ الْعُلَمَاءُ إِنَّ اللَّهَ عَزِيزٌ غَفُورٌ ﴿٢٨﴾

Yang bermaksud: “...*Sesungguhnya yang takut kepada Allah di antara hamba-hamba-Nya hanyalah orang-orang yang berilmu. Sesungguhnya Allah Maha Perkasa, lagi Maha Pengampun.*”

**Sidang jemaah yang dirahmati Allah,**

Ayat ini mengingatkan kita untuk memastikan agar usaha menuntut **ilmu** perlu berlandaskan kesedaran kepada Allah dan **keikhlasan** kerana-Nya. Para ulama terdahulu mencontohi perkara ini. Pencarian **ilmu** yang luas diiringi dengan **keikhlasan** yang mendalam, **kerendahan** hati, rasa takut kepada Allah dan tanggungjawab terhadap masyarakat. Mereka tidak menuntut **ilmu** untuk mencapai kedudukan, tetapi untuk mencapai keredaan Allah dan memberi manfaat kepada orang lain. Keseimbangan inilah yang menjadikan **ilmu** mereka berkesan, berkekalan dan berkat.

Oleh itu, dalam usaha kita menuntut **ilmu**, kita perlu sentiasa ingat bahawa nilai sebenar **ilmu** terletak pada bagaimana ia memperbaiki **akhlak** kita dan menguatkan hubungan kita dengan Allah s.w.t. **Ilmu** tanpa **etika** adalah tidak sempurna. Namun **ilmu** yang berteraskan **keikhlasan**, **kerendahan diri** dan **akhlak** yang baik akan menjadi cahaya yang membimbing bukan sahaja diri kita, bahkan orang-orang di sekeliling kita juga.

### **Ketiga: Ilmu mesti dihayati dan diwariskan**

**Ilmu** dalam Islam bukan sekadar untuk diketahui, tetapi untuk dihayati melalui amalan dan **akhlak**. Apabila seseorang mengamalkan **ilmunya** dengan **keikhlasan**, **ilmu** itu menjadi sesuatu yang nyata, bermakna dan membawa perubahan. Melalui penghayatan **ilmulah**, ia meresap ke dalam hati dan diberi kehidupan.

Ini juga merupakan cara yang paling berkesan untuk mewariskan **ilmu**. Sebelum ia disampaikan melalui kata-kata, perbuatan serta kelakuan kita perlu dititikberatkan terlebih dahulu. Mengamalkan nilai baik secara konsisten, keimanan serta **akhlak** yang mulia meninggalkan kesan yang lebih mendalam dan berkekalan berbanding dengan sekadar pengajaran lisan. Inilah sebabnya penyampaian **ilmu** yang paling berkesan adalah apabila ia diterapkan dalam kehidupan.

### **Sidang jemaah yang dirahmati Allah,**

Marilah kita berusaha menjadi golongan yang **ilmunya** menghasilkan **keikhlasan, kerendahan diri** dan amal soleh. Semoga **ilmu** kita mendekatkan kita kepada Allah, menambah rasa takut dan cinta kita kepada-Nya, memperbaiki **akhlak** kita, serta menyumbang kepada kebaikan masyarakat. Semoga Allah s.w.t. menjadikan kita dalam kalangan mereka yang mengamalkan **ilmu** yang telah dipelajari. Amin, ya Rabbal 'Alamin.

أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، فَاسْتَغْفِرُوهُ إِنَّهُ هُوَ الْغَفُورُ  
الرَّحِيمُ.

## Khutbah Kedua

الْحَمْدُ لِلَّهِ حَمْدًا كَثِيرًا كَمَا أَمَرَ، وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ أَجْمَعِينَ. أَمَا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى فِيمَا أَمَرَ، وَانْتَهُوا عَمَّا نَهَى عَنْهُ وَزَجَرَ.

أَلَا صَلُّوا وَسَلِّمُوا عَلَى النَّبِيِّ الْمُصْطَفَى، فَقَدْ أَمَرَنَا اللَّهُ بِذَلِكَ حَيْثُ قَالَ فِي كِتَابِهِ الْعَزِيزِ: إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا. اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ.

وَارِضْ اللَّهُمَّ عَنِ الْخُلَفَاءِ الرَّاشِدِينَ الْمُهَدِّينَ سَادَاتِنَا أَبِي بَكْرٍ وَعُمَرَ وَعُثْمَانَ وَعَلِيٍّ، وَعَنْ بَقِيَّةِ الصَّحَابَةِ وَالْقُرَابَةِ وَالتَّابِعِينَ، وَتَابِعِي التَّابِعِينَ، وَعَنَّا مَعَهُمْ وَفِيهِمْ بِرَحْمَتِكَ يَا رَحِيمَ الرَّاحِمِينَ.

اللَّهُمَّ اغْفِرْ لِلْمُؤْمِنِينَ وَالْمُؤْمِنَاتِ، وَالْمُسْلِمِينَ وَالْمُسْلِمَاتِ، الْأَحْيَاءِ مِنْهُمْ وَالْأَمْوَاتِ. اللَّهُمَّ ادْفَعْ عَنَّا الْبَلَاءَ وَالْوَبَاءَ وَالرُّلَازِلَ وَالْمِحْنَ، مَا ظَهَرَ مِنْهَا وَمَا بَطَنَ، عَنِ بَلَدِنَا خَاصَّةً، وَسَائِرِ الْبُلْدَانِ عَامَّةً، يَا رَبَّ الْعَالَمِينَ. اللَّهُمَّ أَنْصُرْ إِخْوَانَنَا الْمُسْتَضْعَفِينَ فِي عَزَّةٍ وَفِي فِلِسْطِينَ وَفِي كُلِّ مَكَانٍ عَامَّةً، يَا رَحِيمَ الرَّاحِمِينَ. اللَّهُمَّ بَدِّلْ خَوْفَهُمْ أَمْنًا، وَحُزْرَهُمْ فَرَحًا، وَهَمَّهُمْ فَرَجًا، يَا رَبَّ الْعَالَمِينَ. اللَّهُمَّ اكْتُبِ السَّلَامَ وَالسَّلَامَ وَالْأَمْنَ وَالْأَمَانَ لِلْعَالَمِ كُلِّهِ

وَلِلنَّاسِ أَجْمَعِينَ. رَبَّنَا آتِنَا فِي الدُّنْيَا حَسَنَةً، وَفِي الآخِرَةِ حَسَنَةً، وَقِنَا عَذَابَ  
النَّارِ.

عِبَادَ اللَّهِ، إِنَّ اللَّهَ يُأْمُرُ بِالْعَدْلِ وَالْإِحْسَانِ وَإِيتَاءِ ذِي الْقُرْبَى، وَيَنْهَى عَنِ  
الْفَحْشَاءِ وَالْمُنْكَرِ وَالْبَغْيِ، يَعِظُكُمْ لَعَلَّكُمْ تَذَكَّرُونَ، فَادْكُرُوا اللَّهَ الْعَظِيمَ  
يَذْكُرْكُمْ، وَاشْكُرُوا عَلَى نِعْمِهِ يَزِدْكُمْ، وَاسْأَلُوهُ مِنْ فَضْلِهِ يُعْطِكُمْ، وَلَا تَكْفُرْ  
اللَّهُ أَكْبَرُ، وَاللَّهُ يَعْلَمُ مَا تَصْنَعُونَ.